



中国经典名著

全唐诗

(三十九)

黄怀仁 齐思明 校正

学苑音像出版社

目 录

第七百一十二卷.....	1
第七百一十三卷.....	9
第七百一十四卷.....	14
第七百一十五卷.....	31
第七百一十六卷.....	44
第七百一十七卷.....	61
第七百一十八卷.....	83
第七百一十九卷.....	93
第七百二十卷.....	98
第七百二十一卷.....	113
第七百二十二卷.....	126
第七百二十三卷.....	142
第七百二十四卷.....	164
第七百二十五卷.....	174
第七百二十六卷.....	183
第七百二十七卷.....	189
第七百二十八卷.....	204
第七百二十九卷.....	233
第七百三十卷.....	254
第七百三十一卷.....	260
第七百三十二卷.....	269
第七百三十三卷.....	275
第七百三十四卷.....	282
第七百三十五卷.....	291

第七百一十二卷

客舍寓怀

钱珣

洒洒滩声晚霁时，客亭风袖半披垂。野云行止谁相待，
明月襟怀只自知。无伴偶吟溪上路，有花偷笑腊前枝。
牵情景物潜惆怅，忽似伤春远别离。

送王郎中

钱珣

惜别远相送，却成惆怅多。独归回首处，争那暮山何。

江行无题一百首

钱珣

倾酒向涟漪，乘流欲去时。寸心同尺璧，投此报冯夷。
江曲全萦楚，云飞半自秦。岷山回首望，如别故乡人。
浦烟含夜色，冷日转秋旻。自有沈碑在，清光不照人。
楚岸云空合，楚城人不来。只今谁善舞，莫恨废章台。
行背青山郭，吟当白露秋。风流无屈宋，空咏古荆州。



晚来渔父喜，网重欲收迟。恐有长江使，金钱愿赎龟。
去指龙沙路，徒悬象阙心。夜凉无远梦，不为偶闻砧。
雾云疏有叶，雨浪细无花。稳放扁舟去，江天自有涯。
好日当秋半，层波动旅肠。已行千里外，谁与共秋光。
润色非东里，官曹更建章。宦游难自定，来唤棹船郎。
夜江清未晓，徒惜月光沉。不是因行乐，堪伤老大心。
翳日多乔木，维舟取束薪。静听江叟语，尽是厌兵人。
箭漏日初短，汀烟草未衰。雨馀虽更绿，不是采蘋时。
山雨夜来涨，喜鱼跳满江。岸沙平欲尽，垂蓼入船窗。
渚边新雁下，舟上独凄凉。俱是南来客，怜君缀一行。
云密连江暗，风斜著物鸣。一杯真战将，笑尔作愁兵。
柳拂斜开路，篱边数户村。可能还有意，不掩向江门。
不识相如渴，徒吟子美诗。江清惟独看，心外更谁知。
牵路沿江狭，沙崩岸不平。尽知行处险，谁肯载时轻。
憔悴异灵均，非谗作逐臣。如逢渔父问，未是独醒人。
水含秋夜静，云带夕阳高。诗癖非吾病，何妨吮短豪。
带舟维古岸，还似阻西陵。箕伯无多怒，回头诘不能。
秋云久无雨，江燕社犹飞。却笑舟中客，今年未得归。
帆翅初张处，云鹏怒翼同。莫愁千里路，自有到来风。



佳节虽逢菊，浮生正似萍。故山何处望，荒岸小长亭。
月下江流静，村荒人语希。鹭鸳虽有伴，仍共影双飞。
斗转月未落，舟行夜已深。有村知不远，风便数声砧。
一惊沙鸟迅，飞溅夕阳波。不顾鱼多处，应防一目罗。
行到楚江岸，苍茫人正迷。只如秦塞远，格磔鹧鸪啼。
渐觉江天远，难逢故国书。可能无往事，空食鼎中鱼。
岸草连荒色，村声乐稔年。晚晴贪获稻，闲却彩菱船。
滩浅多游鹭，江清易见鱼。怪来吟未足，秋物欠红蓂。
蛩响依沙草，萤飞透水烟。夜凉谁咏史，空泊运租船。
睡稳叶舟轻，风微浪不惊。人居芦苇岸，终夜动秋声。
自念平生意，曾期一郡符。可知因谪宦，斑鬓入江湖。
水天凉夜月，不是少清光。好景随人物，秦淮忆建康。
古来多思客，摇落恨江潭。今日秋风至，萧疏过沔南。
映竹疑村好，穿芦觉渚幽。渐安无旷土，姜芋当农收。
烟渚复烟渚，画屏休画屏。引愁天未去，数点暮山青。
秋风动客心，寂寂不成吟。飞上危檣立，莺啼报好音。
见底高秋水，开怀万里天。旅吟还有伴，沙柳数枝蝉。
九日自佳节，扁舟无一杯。曹园旧樽酒，戏马忆高台。
兵火有馀烬，贫村才数家。无人争晓渡，残月下寒沙。



渚禽菱芡足，不向稻粱争。静宿凉湾月，应无失侣声。
轻云未扑霜，树杪橘初黄。行是知名物，过风过水香。
土旷深耕少，江平远钓多。平生皆弃本，金革竟如何。
海月非常物，等闲不可寻。披沙应有地，浅处定无金。
风晚冷飕飕，芦花已白头。旧来红叶寺，堪忆玉京秋。
渺渺望天涯，清涟浸赤霞。难逢星汉使，乌鹊日乘槎。
风好来无阵，云开去有踪。钓歌无远近，应喜罢罛罾。
吴疆连楚甸，楚俗异吴乡。谩把樽中物，无人啄蟹黄。
岸绿野烟远，江红斜照微。撑开小渔艇，应到月明归。
雨馀江始涨，漾漾见流薪。曾叹河中木，斯言忆古人。
垂露晚犹浓，清风不易逢。涉江虽已晚，高树搴芙蓉。
乘舟维夏口，烟野独行时。不见头陀寺，空怀幼妇碑。
晚泊武昌岸，津亭疏柳风。数株曾手植，好事忆陶公。
舟航依浦定，星斗满江寒。若比阴霾日，何妨夜未阑。
近戍离金落，孤岑望火门。惟将知命意，潇洒向乾坤。
丛菊生堤上，此花长后时。有人还采掇，何必在春期。
景夕残霞落，秋寒细雨晴。短纓何用濯，舟在月中行。
堤坏漏江水，地坳成野塘。晚荷人不折，留取作秋香。
左宦终何路，摅怀亦自宽。襞笺嘲白鹭，无意喻臬鸾。



楼空人不归，云白去时衣。黄鹤无心下，长应笑令威。
白帝朝惊浪，阳台暮映云。等闲生险易，世路只如君。
橹慢生轻浪，帆虚带白云。客船虽狭小，容得瘦将军。
静看秋江水，风渐浪微平。人间驰竞处，尘土自波成。
风借帆方疾，风回棹却迟。较量人世事，不校一毫厘。
咫尺愁风雨，匡庐不可登。只疑云雾窟，犹有六朝僧。
江草何多思，冬青尚满洲。谁能惊鵬鸟，作赋为沙鸥。
幸有烟波兴，宁辞笔砚劳。缘情无怨刺，却似反离骚。
沙上独行时，高吟到楚词。难将垂岸蓼，盈把当江蓠。
秋寒鹰隼健，逐雀下云空。知是江湖客，无心击塞鸿。
幽怀念烟水，长恨隔龙沙。今日滕王阁，分明见落霞。
江流何渺渺，怀古独依依。渔父非贤者，芦中但有矶。
风雨正甘寝，云霓忽晓晴。放歌虽自遣，一岁又峥嵘。
幽思正迟迟，沙边濯弄时。自怜非博物，犹未识皋葵。
曾有烟波客，能歌西塞山。落花惟待月，一钓紫菱湾。
千顷水纹细，一拳岚影孤。君山寒树绿，曾过洞庭湖。
光阔重湖水，低斜远雁行。未曾无兴咏，多谢沈东阳。
晚菊绕江垒，忽如开古屏。莫言时节过，白日有馀馨。
日落长亭晚，山门步障青。可怜无酒分，处处有旗亭。



远岸无行树，经霜有伴红。停船搜好句，题叶赠江枫。
身世比行舟，无风亦暂休。敢言终破浪，惟愿稳乘流。
数亩苍苔石，烟濛鹤卵洲。定因词客遇，名字始风流。
兴闲停桂楫，路好过松门。不负佳山水，还开酒一樽。
短楫休敲桂，孤根自驻萍。自怜非剑气，空向斗牛星。
高浪如银屋，江风一发时。笔端降太白，才大语终奇。
细竹渔家路，晴阳看结罾。喜来邀客坐，分与折腰菱。
平湖五百里，江水想通波。不奈扁舟去，其如决计何。
数逢云断处，去岸映高山。身到章江日，应犹未得闲。
一湾斜照水，三版顺风船。未敢相邀钓，劳生只自怜。
江雨正霏微，江村晚渡希。何曾妨钓艇，更待得鱼归。
新野旧楼名，浔阳胜赏情。照人长一色，江月共凄清。
愿饮西江水，那吟北渚愁。莫教留滞迹，远比蔡昭侯。
湖口分江水，东流独有情。常时好风物，谁伴谢宣城。
浔阳江畔菊，应似古来秋。为问幽栖客，吟时得酒不。
高峰有佳号，千尺倚寒风。若使炉烟在，犹应为上公。
万木已清霜，江边村事忙。故溪黄稻熟，一夜梦中香。
楚水苦萦回，征帆落又开。可缘非直路，却有好风来。
远谪岁时晏，暮江风雨寒。仍愁系舟处，惊梦近长滩。



春恨三首

钱珣

负罪将军在北朝，秦淮芳草绿迢迢。
高台爱妾魂销尽，始得丘迟为一招。
久戍临洮报未归，篋香销尽别时衣。
身轻愿比兰阶蝶，万里还寻塞草飞。
永巷频闻小苑游，旧恩如泪亦难收。
君前愿报新颜色，团扇须防白露秋。

蜀国偶题

钱珣

忽忆明皇西幸时，暗伤潜恨竟谁知。
佩兰应语宫臣道，莫向金盘进荔枝。

未展芭蕉

钱珣

冷烛无烟绿蜡干，芳心犹卷怯春寒。
一缄书札藏何事，会被东风暗拆看。



同程九早入中书（一作钱起诗）

钱珣

汉家贤相重英奇，蟠木何材也见知。不意云霄能自致，
空惊鹓鹭忽相随。腊雪初明柏子殿，春光欲上万年枝。
独惭皇鉴明如日，未厌春光向玉墀。



第七百一十三卷

陈情献中丞

喻坦之

孤拙竟何营，徒希折桂名。始终谁肯荐，得失自难明。
贡乏雄文献，归无瘠土耕。沧江长发梦，紫陌久惭行。
意纵求知切，才惟惧鉴精。五言非琢玉，十载看迁莺。
取进心甘钝，伤嗟骨每惊。尘襟痕积泪，客鬓白新茎。
顾盼身堪教，吹嘘羽觉生。依门情转切，荷德力须倾。
奖善犹怜贡，垂恩必不轻。从兹便提挈，云路自生荣。

长安雪后

喻坦之

碧落云收尽，天涯雪霁时。草开当井地，树折带巢枝。
野渡滋寒麦，高泉涨禁池。遥分丹阙出，迥对上林宜。
宿片攀檐取，凝花就砌窥。气凌禽翅束，冻入马蹄危。
北想连沙漠，南思极海涯。冷光兼素彩，向暮朔风吹。



送友人游东川

喻坦之

食尽须分散，将行几愿留。春兼三月闰，人拟半年游。
风俗同吴地，山川拥梓州。思君登栈道，猿啸始应愁。

题樟亭驿楼

喻坦之

危槛倚山城，风帆槛外行。日生沧海赤，潮落浙江清。
秋晚遥峰出，沙干细草平。西陵烟树色，长见伍员情。

大梁送友人东游

喻坦之

自古东西路，舟车此地分。河声梁苑夜，草色楚田曛。
雁已多南去，蝉犹在此闻。圣朝无谏猎，何计谒明君。

送友人游蜀

喻坦之

为儒早得名，为客不忧程。春尽离丹阙，花繁到锦城。
雪消巴水涨，日上剑关明。预想回来树，秋蝉已数声。



留别友人书斋

喻坦之

相见不相睽，一留日已西。轩凉庭木大，巷僻鸟巢低。
背俗修琴谱，思家话药畦。卜邻期太华，同上上方梯。

题耿处士林亭

喻坦之

身向闲中老，生涯本豁然。草堂山水下，渔艇鸟花边。
窥井猿兼鹿，啼林鸟杂蝉。何时人事了，依此亦高眠。

商於逢友人

喻坦之

行役何时了，年年骨肉分。春风来汉棹，雪路入商云。
水险溪难定，林寒鸟异群。相逢聊坐石，啼狖语中闻。

灞上逢故人

喻坦之

花落杏园枝，驱车问路岐。人情谁可会，身事自堪疑。
岳雨狂雷送，溪槎涨水吹。家山如此景，几处不相随。



发浙江

喻坦之

岛屿遍含烟，烟中济大川。山城犹转漏，沙浦已摇船。
海曙霞浮日，江遥水合天。此时空阔思，翻想涉穷边。

晚泊盱眙

喻坦之

广苇夹深流，萧萧到海秋。宿船横月浦，惊鸟绕霜洲。
云湿淮南树，笳清泗水楼。徒悬乡国思，羁迹尚东游。

归江南

喻坦之

归日值江春，看花过楚津。草晴虫网遍，沙晓浪痕新。
莲叶初浮水，鸥雏已狎人。渔心惭未遂，空厌路岐尘。

代北言怀

喻坦之

困马榆关北，那堪落景催。路行沙不绝，风与雪兼来。
草得春犹白，鸿侵夏始回。行人莫远入，戍角有馀哀。



春游曲江

喻坦之

误入杏花尘，晴江一看春。菰蒲虽似越，骨肉且非秦。
曲岸藏翘鹭，垂杨拂跃鳞。徒怜汀草色，未是醉眠人。

和范秘书宿省中作

喻坦之

清省宜寒夜，仙才称独吟。钟来宫转漏，月过阁移阴。
鹤避灯前尽，芸高幄外深。想知因此兴，暂动忆山心。

寄华阴姚少府

喻坦之

泰华当公署，为官兴可知。砚和青霭冻，帘对白云垂。
峻掌光浮日，危莲影入池。料于三考内，应惜德音移。

晚泊富春寄友人

喻坦之

江钟寒夕微，江鸟望巢飞。木落山城出，潮生海棹归。
独吟霜岛月，谁寄雪天衣。此别三千里，关西信更希



第七百一十四卷

梅花

崔道融

数萼初含雪，孤标画本难。香中别有韵，清极不知寒。
横笛和愁听，斜枝倚病看。朔风如解意，容易莫摧残。

铜雀妓二首

崔道融

严妆垂玉箸，妙舞对清风。无复君王顾，春来起渐慵。
歌咽新翻曲，香销旧赐衣。陵园春雨暗，不见六龙归。

春闺二首

崔道融

寒食月明雨，落花香满泥。佳人持锦字，无雁寄辽西。
欲剪宜春字，春寒入剪刀。辽阳在何处，莫望寄征袍。

访僧不遇

崔道融

寻僧已寂寞，林下锁山房。松竹虽无语，牵衣借晚凉。



田上

崔道融

雨足高田白，披蓑半夜耕。人牛力俱尽，东方殊未明。

月夕

崔道融

月上随人意，人闲月更清。朱楼高百尺，不见到天明。

槿花

崔道融

槿花不见夕，一日一回新。东风吹桃李，须到明年春。

西施滩

崔道融

宰嚭亡吴国，西施陷恶名。浣纱春水急，似有不平声。

江上逢故人

崔道融

故里琴樽侣，相逢近腊梅。江村买一醉，破泪却成咍。

